

Tuesday, October 14, 2025

Time - 2:30pm

HM VISITS SAIRANG RAILWAY STATION

Home Minister Pu K.Sapdanga'n State pawn atanga rel hmanga zin mi lo lut ten Inner Line Permit la chhuak tura rel station-a rei tak intlar ngai thin chu chinfel vat a tul thu a sawi.

Home Minister hian tukin khan Sairang Railway Station-a rel a lo luh hnu a State pawn atanga zin mi lo lutte dawnawm an nih dan chu a enfiah a. ILP lak chhuahna tura mipui tawt lutuk ti ziaawm tura hmalak thuai a tul thu sawiin Mizoram mi leh sate leh ILP dil chawp ngai lote tan chhuahna hnan buatsaih vat turin NF Railway thuneitute chu a hrilh a ni.

Home Minister hian ILP pekchhuah leh endikna kalpui dan a enpui a, Sairang Railway Station tih changtlun zelna tura ruahmanna la awmte chu NF Railways-a thawktuten sawifiahin an entir a. He huna tarlan danin, rel a lo thlen hian zin mi 250 atanga 300 vel chu Sairang Railway Station-a chhuk an awm thin a. Transport Department ruahmannain Sairang leh Aizawl inkar tlan tur, MST Bus pahnih dah a ni tawh a, chuan man hi mi pakhat tan Rs. 80 a ni. State pawn atanga lo lut, zin miten ILP dil a hun rei tak an hman loh nan Online-a dilna siam a nih bakah rel chhungah ILP dilna form semchhuah theih tura ruahmanna siam tur a nih thu tarlan a ni a. Tuna hman mek, Online ILP Guidelines Version 2 chu siamthat mek niin awlsam zawka dilna buaipui zung zung a nih theih nan Version 3 pawh peihfel tep a nih thu tarlan a ni. Sairang Railway Station-ah hian zin mite kaihrui a, Mizoram hmun nuam leh thlawh tlakte lo kawhhmuh zung zung thei tur Tourist Facilitation Centre ruahman a tul thu sawi a ni bawk.



TRUCKERS

Tunhnaiah Aizawl leh Silchar inkar kawngpui a chhiat nasat leh tawh avangin darkar 24 liamta chhung khan lirthei 717 a tangkhang.

Tukin dar 8 leh a chanve atanga a let zawnga chhuta darkar 24 chhung khan Kawnpui atanga Aizawl pan bungraw hrang hrang phur lirthei pakhatmah chhuah a ni lova. Lirthei ruak, Sairang peng leh Mualkhang/Khamrang inkara tangkhang Assam lam pan tur pakhat mah chhuah a awm lo bawk a, hemi hun chhung hian Khamrang a Assam lam pan truck ruak 316 chu an tangkhang mek a, Kawnpui a Aizawl lam pan bungraw phur tangkhang 401 a awm bawk a, heti hian avaiin Aizawl leh Silchar inkarah kawng chhiat vangin lirthei 717 a tangkhang a ni.

Thu dawn danin Sairang leh Kawnpui inkar kawng siam that hi a chhiat leh nasat tawh em avangin kawng a nal em em a, truck ruak a kal hlei thei lova, tlu leh tang an tam thei hle a, vawiin atangin Kawnpui atanga Khamrang inkar kawng thawmthat hna an thawk tan a, NHIDCL lamin an thawk a, PWD in Boulder an ngaihtuah thung a ni.



MPCC PRESS CONFERENCE

Mizoram Pradesh Congress Committee chuan Lengpui Airport chu Indian Air Force nen inphel emaw an kuta hlan emaw an duh lo tih an sawi.

He thu hi MPCC spokesperson Pu John Siamkunga chuan vawiin khan Press Club-a thuthar thehdarhtute hnenah sawiin, Lengpui Airport chu Airport Authority of India (AAI) enkawl tir an duh ber a ti a. Mizoram Airport a nih anga zalen tak leh thlamuang taka mipui ten an hman theiha a awm chu an duh ber a ni tih sawiin, Indian Air Force (IAF), Ministry of Defence kuta hlan an phal ngai dawn lo tih a sawi a ni.



ALL NGO MAMIT

All NGO Mamit leh Commercial Vehicle Association, Mamit chuan Mamit kawngpui chu a chhiat em avang leh sawrkarin an ngaihthah avangin Ningani (October ni 16) atangin Mamit panna kawngpui tiamchin awm lova dan an tum.

All NGO Mamit leh Commercial Vehicle Association, Mamit chuan nizan khan Siamliana Hall, Mamit-a Joint Meeting neiin an thuchhuah tarlan danin Mamit District chak lakna leh veivahna Motor kawngpui pawimawh Mamit atanga Aizawl panna kawng, Mamit leh Bairabi inkar leh Mamit leh Zawinuam inkar kawngpui chu lirthei eng chi tan pawh kal hleih theih loh khawpa a chhia chu a rang thei ang bera siam tura Mizoram Sorkar an ngenna chu October ni 4-12, 2025 chhung an ngaichang an ti aa, Sorkar hmalakna mumal leh beisei anga hnathawh a awm loh avangin tiamchin awm lovin dan an tum thu an sawi a ni.



RANDOM EXAMINATION FOR CLASS IX

Mizoram Board of School Education chuan thla thar November ni 25 hian Pawl 9 zirlai tan Random Examination a buatsaih dawn.

MBSE thuchhuah tarlan danin November ni 25-a Random Examination neih turah hian zirlai ten pawl 8 an nih laia an zirchhuah hrang hrang leh an thiamna enfiah nan Multiple Choice format in zawhna an chhang dawn a, Mizoram puma pawl 9 zawng zawng ti lovin District hrang hranga sikul 234 ah exam hi an buatsaih dawn a ni.

